



Nuuk d. 12. november 2009

**Inatsisartut suleriaasianni § 36, imm. 1 naapertorlugu Naalackersuisut siulittaasuannut Kuupik Kleist-mut apeqqut imaattoq matumuuna saqqummiuppara:**

Ippassaq oqallinnermi Ineqarnermut Naalackersuisumut tatiginnikkunnaarnermik saqqummiiviusumi taassuma Illuut A/S pillugu Inatsisartunut ilaasortamut Hans Enoksen-imut, (Siumut) eqqunngitsumik paasissutissiinera pillugu, tamatumani kommunerujussuarni sisamani Borgmesterinut isumaqatigiissusiortoqarsimasoq oqaatigineqarluni. Tamatuma kingorna tassunga atasumik uissuumminarluinnartumik pisoqarpoq. KANUKOKA-p Siulittaasuani Isumaqatigiissusiortoqarsimaneranik saqqummiussa eqqunngitsuutinneqarpoq.

- 1) Ineqarnermut Naalackersuisoq Jens B. Frederiksen akissuteqaammini allappoq, ***isumaqatigiissuteqartoqarsimasoq***, illuatungiliuttut paasinninnerat naapertorlugu allaganngorlugu isumaqatigiissutaasussaavoq, taamaaliornermut atasumik kingunerluutaasinnaasut annertuut eqqarsaatigigaanni.
- 2) Pinngitsoortitsinissamik siunnersuuteqarnermut atatillugu Naalackersuisut Siulittaasuat Kuupik Kleist nassuiaateqarnermini oqarpoq, ***oqaasiinnarmik isumaqatigiittoqarsimasoq***, tamatumalu pisariaqalersillugu tatiginninnginnermik saqqummeeqqinnissaq - Naalackersuisumut ataasiinnaanngitsumut – kisiannili tamatumuunakkut Naalackersuisunut tamanut, pissutigalugu Naalackersuisut akisussaaitaanerat pillugu inatsimmi aalajangersagaq, tassa Naalackersuisunut ilaasortat paatsuungananngitsumik eqqortumillu paasissutissiisarnissaat Naalackersuisut siulittaasuannit tusaajumaneqarani paasinngitsuusarneqarmat.
- 3) Tamatumalu Aningaasaqarnermut Naalackersuisoq Palle Christiansen issiavimminit nikuitippaa imatullu oqaaseqarpoq, ***sumilluunniit isumaqatigiissuteqartoqanngilluinnarpoq***.

Immaqa oqartoqarsinnaavoq, qanoq oqariartuuteqarnissamut periarfissaasut pisup neriusaatut tamakkiisunngortiinnarai, tassuunakkut soorlu tipserluni eqqoriaaffissaq tamakkiisumik

eqqoriaaffissatut sananeqaannartoq, tassanimi naluneqanngitsutut inerniliussassamut ataasiinnaasumut pingasut periarfissaammata.

Ajornartorsiutaaliinnartorli unaavoq uani arsaannerup inernissaa eqqoriarneqassanngimmat, kisiannili inatsimmik tunngaveqartumik eqqortoq eqqoriaassutigineqassalluni, tamatumani qanoq pisoqaraluarpalluunniit ataasiinnaq ajugaasinnaavoq marlullu ajorsartussaallutik.

Piumasarissavara Naalakkersuisunut ilaasortat akisussaanagerat pillugu inatsit tunngavigalugu uani pineqartumi kina eqqortumik oqalunnersoq pillugu ullumikkumiit ullut 10 –it qaangiutsinnagit tamakkiisumik akisussaassuseqartumik eqqortumillu akineqarnissara.

Ajornannginnerulersitsiniarluni apeqqutaasoq tipserfissatut inissinneqarpoq, tassani kina eqqortumik oqalunnersoq kryds-siliiffigeriaannangorlugu:

Ineqarnermut ...Naalakkersuisoq; Jens B. Frederiksen \_\_\_\_\_

Naalakkersuisut Siulittaasuat; Kuupik Kleist \_\_\_\_\_

Aningaasaqarnermut Naalakkersuisoq; Palle Christiansen \_\_\_\_\_

Inussiarnersumik inuulluaqqusillunga

**Per Berthelsen, Siumut**

**Inatsisartunut ilaasortaq**